



Ein cyf/Our ref MA-RE-5685-24

John Griffiths AS
Cadeirydd y Pwyllgor Llywodraeth Leol a Thai
Senedd Cymru
Bae Caerdydd
Caerdydd
CF99 1SN

2 Gorffennaf 2024

Annwyl John

Bil Cyllid Llywodraeth Leol (Cymru)

Rwy'n ysgrifennu atoch i'ch hysbysu bod Memorandwm Esboniadol diwygiedig wedi'i gyhoeddi cyn trafodion Cyfnod 3 ar gyfer Bil Cyllid Llywodraeth Leol (Cymru), ac mae copi wedi'i gynnwys gyda'r llythyr hwn.

Mewn ymateb i argymhelliad Cyfnod 1 y Pwyllgor y dylai Llywodraeth Cymru gynnal adolygiad statudol o'r defnydd o bwerau i wneud rheoliadau yn y Bil, rwyf wedi cynnwys ymrwymiad yn y Memorandwm Esboniadol i gynnal adolygiad ôl-weithredu anstatudol o weithrediad ac effaith y Bil, gan gynnwys y defnydd o'r bwerau i wneud is-ddeddfwriaeth, cyn diwedd tymor y Seithfed Senedd (fel yr eglurais yn fy ymateb gwreiddiol i argymhellion y Pwyllgor, nid yw'r llywodraeth yn ystyried bod cynnwys gofyniad statudol i gynnal adolygiad yn angenrheidiol). Mae paragraff 11.5 o'r Memorandwm Esboniadol wedi'i ddiweddarau i gadarnhau hyn.

Mae nifer o ddiwygiadau eraill hefyd wedi'u gwneud i'r Memorandwm Esboniadol i adlewyrchu ymatebion y llywodraeth i argymhellion a wnaed gan y Pwyllgor Cyllid a'r Pwyllgor Deddfwriaeth, Cyfiawnder a'r Cyfansoddiad, a hefyd welliannau gan y llywodraeth a wnaed i'r Bil yn ystod Cyfnod 2. Rhestrir yr holl ddiwygiadau hyn yn Atodiad A isod.

Rwy'n gobeithio y bydd yr wybodaeth hon yn ddefnyddiol ichi.

Yn gywir

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Correspondence.Rebecca.Evans@gov.wales
Gohebiaeth.Rebecca.Evans@llyw.cymru

Rydym yn croesawu derbyn gohebiaeth yn Gymraeg. Byddwn yn ateb gohebiaeth Gymraeg sy'n dod i law yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rebecca Evans.

Rebecca Evans AS/MS

Ysgrifennydd y Cabinet dros Gyllid, y Cyfansoddiad a Swyddfa'r Cabinet
Cabinet Secretary for Finance, Constitution & Cabinet Office

Atodiad A

Bil Cyllid Llywodraeth Leol (Cymru) – Diwygiadau a wnaed i'r Memorandwm Esboniadol/Asesiad Effaith Rheoleiddiol i adlewyrchu ymatebion y llywodraeth i argymhellion Cyfnod 1 gan y Pwyllgor Llywodraeth Leol a Thai

Argymhelliad	Ymateb y llywodraeth	Diwygiadau i'r Memorandwm Esboniadol/Asesiad Effaith Rheoleiddiol
<p>Argymhelliad 2: Dylai Llywodraeth Cymru ddiwygio'r Bil i gynnwys gofyniad i gynnal adolygiad statudol o'r defnydd o bwerau o dan adrannau 5 [rhyddhadau ardrethi annomestig], 9 [esemptiadau ardrethi annomestig], 10 [lluosyddion ardrethi annomestig], 13 [osgoi ardrethi annomestig] a 18 [disgowntiau'r dreth gyngor] o'r Bil. Dylai'r adolygiad gael ei gynnal cyn diwedd y Seithfed Senedd a dylai gynnwys:</p> <ul style="list-style-type: none">• Asesiad gan Weinidogion Cymru o fecanweithiau deddfwriaethol amgen ar gyfer gwneud newidiadau i deddfwriaeth Cymru yng nghyd-destun rhyddhadau, esemptiadau, lluosyddion a darpariaethau gwrth-osgoi mewn perthynas ag ardrethi annomestig, a disgowntiau'r dreth gyngor; a• Gofyniad i ymgynghori â'r Senedd.	<p>DERBYN MEWN EGWYDDOR. Yn hytrach na chynnwys ymrwymiad i gynnal adolygiad statudol ar wyneb y Bil, bydd y llywodraeth yn diwygio'r Memorandwm Esboniadol ar ôl Cyfnod 2 i gynnwys ymrwymiad i gynnal adolygiad ôl-weithredu o weithrediad ac effaith y ddeddfwriaeth hon cyn diwedd y Seithfed Senedd. Bydd hyn yn cynnwys ystyried y pwerau perthnasol i wneud is-ddeddfwriaeth yn y Bil.</p>	<p>Gwnaed diwygiadau i baragraff 11.5 o Bennod 11 o'r Memorandwm Esboniadol, i gynnwys yr ymrwymiad i gynnal yr adolygiad ôl-weithredu a nodwyd mewn ymateb i'r argymhelliad Cyfnod 1 gan y Pwyllgor.</p>

Bil Cyllid Llywodraeth Leol (Cymru) – Diwygiadau a wnaed i'r Memorandwm Esboniadol/Asesiad Effaith Rheoleiddiol i adlewyrchu ymatebion y llywodraeth i argymhellion Cyfnod 1 gan y Pwyllgor Cyllid

Argymhelliad	Ymateb y llywodraeth	Diwygiadau i'r Memorandwm Esboniadol/Asesiad Effaith Rheoleiddiol
<p>Argymhelliad 4: Mae'r Pwyllgor yn argymhell bod y Gweinidog yn adolygu'r pwyntiau a godwyd ynghylch anghysondebau yn yr Asesiad Effaith Rheoleiddiol a nodir yn yr adran hon, gyda'r bwriad o egluro'r wybodaeth a nodwyd mewn Asesiad Effaith Rheoleiddiol diwygiedig.</p>	<p>DERBYN Rydym yn diolch i'r Pwyllgor am ddod â'r rhain i'n sylw. Byddwn yn adolygu hyn er mwyn sicrhau bod y ffigurau'n gyson. Bydd Asesiad Effaith Rheoleiddiol diwygiedig yn cael ei ddarparu cyn Cyfnod 3.</p>	<p>Gwnaed newidiadau i Dabl 8.2; paragraff 8.128 a pharagraffau 8.91 ac 8.92 i fynd i'r afael ag anghysondebau a nodwyd gan y Pwyllgor ym mharagraff 53 o'ch adroddiad. Mae'r holl ffigurau perthnasol eraill a ddyfynnir yn yr Asesiad Effaith Rheoleiddiol hefyd wedi cael eu hadolygu a'u diweddarau i sicrhau cywirdeb a chysondeb rhwng y testun a'r tablau.</p>
<p>Argymhelliad 5: Mae'r Pwyllgor yn argymhell bod y Gweinidog yn darparu gwybodaeth am y risgiau a'r goblygiadau cost i Gymru, os bydd yn ymwahanu oddi wrth Loegr, o ran amseriad ei hailbrisiadau ardrethi annomestig, ac i'r wybodaeth hon gael ei chynnwys mewn Asesiad Effaith Rheoleiddiol diwygiedig.</p>	<p>DERBYN Fel y mae'r Asesiad Effaith Rheoleiddiol yn egluro, ar hyn o bryd nid yw'n bosibl meintioli'n llawn y costau a'r risgiau a fyddai'n codi yn sgil ymwahanu. Fodd bynnag, mae'n bosibl darparu rhagor o wybodaeth am y goblygiadau sy'n ymwneud ag adnoddau i Asiantaeth y Swyddfa Brisio, ynghyd â'r risgiau lefel uchel. Bydd manylion ychwanegol yn cael eu cynnwys cyn Cyfnod 3.</p>	<p>Mae gwybodaeth ychwanegol wedi'i chynnwys ym mharagraff 8.15 o'r Asesiad Effaith Rheoleiddiol. Byddai ymwahanu oddi wrth Loegr mewn perthynas â'r cylch ailbrisio yn arwain at gynnydd yn y gofynion o ran adnoddau ym mhob maes prisio yng Nghymru. Mae amcangyfrifon Asiantaeth y Swyddfa Brisio yn dangos cost ychwanegol o tua £1m fesul cylch ailbrisio. Gall prisiadau rhai mathau o eiddo fod yn llai cadarn, gan arwain at apelïadau a cholli gwerth ardrethol.</p>
<p>Argymhelliad 6: Mae'r Pwyllgor yn gofyn am ragor o wybodaeth am gyfanswm cost y ddyletswydd newydd i dalwyr ardrethi i ddarparu gwybodaeth gyfredol i Asiantaeth y Swyddfa Brisio, yn benodol, a yw'r gost o £35 a £20 fesul talwr ardrethi yn ychwanegol at y costau a amcangyfrifir ar hyn o bryd ar gyfer gweithgarwch</p>	<p>DERBYN Mae'r ffigurau'n cynrychioli amcangyfrif cyfartalog o gostau ychwanegol cydymffurfio. Bydd y costau gwirioneddol yn dibynnu ar amgylchiadau unigol. I rai talwyr ardrethi, ni fydd costau cydymffurfio â'r ddyletswydd newydd yn golygu costau newydd neu ychwanegol o'u cymharu â'r rhai a delir o dan y system bresennol. Bydd yr wybodaeth hon yn cael ei chynnwys yn yr Asesiad Effaith</p>	<p>Mae'r wybodaeth y gofynnwyd amdani, fel y'i disgrifiwyd mewn ymateb i'r Pwyllgor yn ystod Cyfnod 1, wedi'i chynnwys ym mharagraff 8.126 o'r Asesiad Effaith Rheoleiddiol.</p>

Argymhelliad	Ymateb y Llywodraeth	Diwygiadau i'r Memorandwm Esboniadol/Asesiad Effaith Rheoleiddiol
perthnasol, ac i'r wybodaeth hon gael ei chynnwys mewn Asesiad Effaith Rheoleiddiol diwygiedig.	Rheoleiddiol diwygiedig cyn Cyfnod 3.	
<p>Argymhelliad 7: Mae'r Pwyllgor yn argymhell bod y Gweinidog yn darparu rhagor o wybodaeth am y costau a'r risgiau posibl sy'n gysylltiedig â system ar-lein newydd Asiantaeth y Swyddfa Brisio. Dylai hyn gynnwys pryd y bydd yn cael ei gweithredu a risgiau unrhyw oedi posibl wrth weithredu i dalwyr ardrethi sy'n cydymffurfio â'r gofynion newydd i ddarparu gwybodaeth, ac i'r wybodaeth hon gael ei chynnwys mewn Asesiad Effaith Rheoleiddiol diwygiedig.</p>	<p>DERBYN Nid yw cwblhau ymarfer ailbriso yn 2026 yn ddibynnol ar lansio'r system ar-lein, gan fod Asiantaeth y Swyddfa Brisio eisoes yn paratoi i ymgymryd â'r ymarfer hwnnw o dan y trefniadau presennol. Bwriedir i'r system sicrhau cynaliadwyedd ailbrisiadau amlach dros y tymor hirach. Nid oes unrhyw risg i dalwyr ardrethi sy'n gysylltiedig ag amseriad y lansiad, oherwydd dim ond pan fydd Llywodraeth Cymru ac Asiantaeth y Swyddfa Brisio yn fodlon ei bod yn rhesymol disgwyl i dalwyr ardrethi gydymffurfio y bydd y dyletswyddau'n dod i rym. Bydd yr wybodaeth hon yn cael ei chynnwys, ochr yn ochr â'r amcangyfrif o'r costau a ddarparwyd eisoes, yn yr Asesiad Effaith Rheoleiddiol diwygiedig cyn Cyfnod 3.</p>	<p>Mae paragraff 8.125 o'r Asesiad Effaith Rheoleiddiol wedi'i ddiweddarau i egluro bod proffil cost Asiantaeth y Swyddfa Brisio ar gyfer y system ar-lein yn seiliedig ar ragdybiaeth y bydd yn lansio yn ystod 2026-27. Mae hyn yn amodol ar gadarnhad wrth i'r rhaglen fynd yn ei blaen.</p> <p>Mae paragraff 8.127 o'r Asesiad Effaith Rheoleiddiol wedi'i ddiweddarau i ddarparu'r esboniad a'r eglurhad ychwanegol, a ddarparwyd mewn ymateb i'r Pwyllgor yn ystod Cyfnod 1, ynghylch goblygiadau amseriad cyflwyno'r gwasanaeth ar-lein.</p>

Bil Cyllid Llywodraeth Leol (Cymru) – Diwygiadau a wnaed i'r Memorandwm Esboniadol/Asesiad Effaith Rheoleiddiol i adlewyrchu ymatebion y Llywodraeth i argymhellion Cyfnod 1 gan y Pwyllgor Deddfwriaeth, Cyfiawnder a'r Cyfansoddiad

Argymhelliad	Ymateb y Llywodraeth	Diwygiadau i'r Memorandwm Esboniadol/Asesiad Effaith Rheoleiddiol
<p>Argymhelliad 13: Dylai'r Gweinidog egluro pa weithdrefn craffu fydd yn gymwys i reoliadau a wneir o dan adran 13(1) o Ddeddf Cyllid Llywodraeth Leol 1992 ('Deddf 1992') (fel y'i diwygiwyd).</p>	<p>Bydd rheoliadau a wneir o dan adran 13(1) o Ddeddf 1992 yn ddarostyngedig i'r weithdrefn negyddol fel y'i darperir yn barod yn Neddf 1992. Bydd Tabl 5.1 yn y Memorandwm Esboniadol yn cael ei ddiwygio i adlewyrchu'r sefyllfa hon.</p>	<p>Mae Tabl 5.1 yn y Memorandwm Esboniadol wedi'i ddiwygio.</p>

Bil Cyllid Llywodraeth Leol (Cymru) – Diwygiadau a wnaed i'r Memorandwm Esboniadol/Asesiad Effaith Rheoleiddiol i adlewyrchu gwelliannau Cyfnod 2 gan y Llywodraeth

Gwelliant y llywodraeth	Effaith y gwelliant	Diwygiadau i'r Memorandwm Esboniadol/Asesiad Effaith Rheoleiddiol
<p>Gwelliant 1 y llywodraeth: Adran 14, tudalen 24, llinell 22, ar ôl 'paragraphs', mewnosoder '1(2)',.</p>	<p>Mae'r gwelliant hwn yn sicrhau bod y weithdrefn gadarnhaol yn parhau i fod yn gymwys i bŵer presennol i wneud rheoliadau sy'n ymwneud â gosod y swm dyddiol y gellir ei godi ar gyfer hereditamentau gwag cyn i unrhyw ryddhadau gael eu cymhwyso.</p>	<p>Yr unig newid sy'n ofynnol yw mân ddiweddariad a wneir i adlewyrchu effaith y gwelliant yn yr Atodlen Keeling ar gyfer adran 143A(5)(i) o Ddeddf Cyllid Llywodraeth Leol 1988 ('Deddf 1988').</p>
<p>Gwelliant 2 y llywodraeth: Adran 21, tudalen 33, llinell 27, hepgorer '2029' a mewnosoder '2027'.</p>	<p>Mae'r gwelliant hwn yn disodli cyfeiriad at y flwyddyn 2029 â chyfeiriad at 2027. Bydd hyn yn newid y flwyddyn ddiweddaraf y caiff Gweinidogion Cymru, o dan y pwerau deddfwriaethol presennol, bennu fel y flwyddyn pryd y mae'r rhestr brisio treth gyngor nesaf i gael ei llunio. Y bwriad yw dechrau cylchoedd pum mlynedd ar gyfer ailbrisio'r dreth gyngor yn 2028.</p>	<p>Mae'r Nodiadau Esboniadol wedi'u diweddarau mewn perthynas ag adran 21 'Y weithdrefn ar gyfer llunio rhestrau prisio' i ddisodli cyfeiriad at y flwyddyn 2029 â chyfeiriad at 2027.</p> <p>Mae'r Atodlen Keeling, yn enwedig is-adrannau newydd (3A) i (3C) o fewn adran 22B o Ddeddf 1992, hefyd wedi'u diweddarau yn hyn o beth.</p>
<p>Gwelliant 3 y llywodraeth: Adran 21, tudalen 33, llinell 31, hepgorer '2030' a mewnosoder '2028'.</p>	<p>Mae'r gwelliant hwn yn newid cyfeiriad at y flwyddyn pan fydd y cylchoedd pum mlynedd ar gyfer ailbrisio'r dreth gyngor yn dechrau o dan ddarpariaethau Bil Cyllid Llywodraeth Leol (Cymru), o 2030 i 2028.</p>	<p>Newidiwyd cyfeiriadau at 2030 i 2028 drwy'r Memorandwm Esboniadol, a darparwyd gwybodaeth yn amlinellu canlyniad ymgynghoriad Cam 2.</p> <p>Mae'r paragraffau a'r tablau a ddiwygiwyd fel a ganlyn:</p> <p>Paragraffau - 3.95; 4.9 – 4.13; 8.154; 8.162 – 8.166; 8.168 – 8.169; 8.173; 8.175 – 8.177; 8.180; 9.26;</p>

Gwelliant y llywodraeth	Effaith y gwelliant	Diwygiadau i'r Memorandwm Esboniadol/Asesiad Effaith Rheoleiddiol
		<p>12.9 – 12.10; a 12.17.</p> <p>Tablau - Tabl Crynodeb o'r Asesiad Effaith Rheoleiddiol ar tt.48 – 49; Tablau 8.8 – 8.12; Tabl 8.14; Tablau 12.3; 12.4 a 12.6.</p>
<p>Gwelliant 4 y llywodraeth: Adran 24, tudalen 36, llinell 12, ar ôl '25', mewnosoder 'a pharagraff [yr is-is-baragraff cyntaf i'w fewnosod gan welliant 6] o'r Atodlen (ac adran 15 i'r graddau y mae'n ymwneud â pharagraff [yr is-baragraff cyntaf i'w fewnosod gan welliant 6])'.</p>	<p>Bydd y gwelliant hwn yn sicrhau y bydd yr is-baragraff a fydd yn galluogi Gweinidogion Cymru i ddarparu hawl i apelio i'r Uwch Dribiwnlys mewn cysylltiad â phenderfyniadau a wneir gan Dribiwnlys Prisio Cymru yng nghyd-destun apeliadau o dan baragraffau 5C a 6AA o Atodlen 9 i Ddeddf 1988 yn dod i rym drannoeth diwrnod y Cydsyniad Brenhinol ar gyfer y Bil.</p>	<p>Mae'r Nodiadau Esboniadol, yn enwedig mewn perthynas ag adran 15 o'r Bil, ac Atodlen 1 iddo, sy'n gwneud mân ddiwygiadau a diwygiadau canlyniadol sy'n ymwneud â Rhan 1, wedi'u diwygio i adlewyrchu dyddiad dod i rym yr is-baragraff a fydd yn galluogi Gweinidogion Cymru i ddarparu hawl i apelio i'r Uwch Dribiwnlys mewn cysylltiad â phenderfyniadau a wneir gan Dribiwnlys Prisio Cymru yng nghyd-destun apeliadau o dan baragraffau 5C a 6AA o Atodlen 9 i Ddeddf 1988.</p>
<p>Gwelliant 5 y llywodraeth: Atodlen 1, tudalen 42, ar ôl llinell 10, mewnosoder— 'Deddf Llywodraeth Leol ac Ardrethu 1997 (p. 29) [] (1) Mae Deddf Llywodraeth Leol ac Ardrethu 1997 wedi ei diwygio fel a ganlyn. (2) Yn Atodlen 3, hepgorer paragraff 23.'</p>	<p>Bydd y gwelliant hwn yn ychwanegu cyfeiriad at baragraff 23 o Atodlen 3 i Ddeddf Llywodraeth Leol ac Ardrethu 1997 at yr Atodlen i Fil Cyllid Llywodraeth Leol (Cymru).</p>	<p>Mae'r Nodiadau Esboniadol, yn enwedig mewn perthynas ag adran 15 o'r Bil, ac Atodlen 1 iddo, sy'n gwneud mân ddiwygiadau a diwygiadau canlyniadol sy'n ymwneud â Rhan 1, wedi cael eu diwygio i adlewyrchu ychwanegiad at yr Atodlen i'r Bil, sef cyfeiriad at baragraff 23 o Atodlen 3 i Ddeddf Llywodraeth Leol ac Ardrethu 1997 (at ddiben diddymu'r ddarpariaeth a ddisbyddwyd sy'n ymwneud â therfynau amser ar ryddhadau ardrethi annomestig dewisol na fydd yn gymwys i Gymru mwyach o ganlyniad i Fil</p>

Gwelliant y llywodraeth	Effaith y gwelliant	Diwygiadau i'r Memorandwm Esboniadol/Asesiad Effaith Rheoleiddiol
		<p>Cyllid Llywodraeth Leol (Cymru).</p> <p>Mae'r Atodlen Keeling hefyd yn dangos y newid i Ddeddf Llywodraeth Leol ac Ardrethu 1997.</p>
<p>Gwelliant 6 y llywodraeth:</p> <p>Atodlen 1, tudalen 44, ar ôl llinell 25, mewnosoder— '() ar ôl paragraff 11(1) mewnosoder— "(1A) Regulations under paragraph 1 may also include provision that an appeal lies to the Upper Tribunal in respect of a decision or order given or made by a tribunal established under that paragraph on an appeal under paragraph 5C or 6AA of Schedule 9."; () ym mharagraff 11, yn is-baragraff (1A) (fel y'i mewnosodir gan is-baragraff [yr is-baragraff cyntaf i'w fewnosod gan y gwelliant hwn]) o flaen "5C or 6AA" mewnosoder "5BB, 5BE, ".'</p>	<p>Bydd gwelliant 6 yn sicrhau y caiff rheoliadau ddarparu ar gyfer hawliau apelio i'r Uwch Dribiwnlys, pan fo talwyr ardrethi yn ddarostyngedig i gosb am fethu â chydymffurfio â gofynion i ddarparu gwybodaeth i Asiantaeth y Swyddfa Brisio, CThEF ac awdurdodau lleol. Y bwriad yw sicrhau cysondeb ar draws dyletswyddau tebyg ar dalwyr ardrethi o fewn y system ardrethi annomestig, gan gynnwys y rhai a gyflwynwyd gan adran 12 o'r Bil.</p>	<p>Mae Tabl 5.1 (Crynodeb o'r pwerau i wneud is-ddeddfwriaeth) o'r Memorandwm Esboniadol wedi'i ddiweddarau i gynnwys y gwelliant hwn.</p> <p>Mae'r Nodiadau Esboniadol, yn enwedig mewn perthynas ag adran 15 o'r Bil, ac Atodlen 1 iddo, sy'n gwneud mân ddiwygiadau a diwygiadau canlyniadol sy'n ymwneud â Rhan 1, wedi cael eu diwygio i adlewyrchu'r gwelliant i baragraff 11 o Atodlen 11 i Ddeddf 1988 sy'n ymwneud â hawliau apelio o Dribiwnlys Prisio Cymru i'r Uwch Dribiwnlys mewn cysylltiad â phenderfyniadau a wneir gan awdurdodau lleol, Asiantaeth y Swyddfa Brisio neu CThEF.</p> <p>Mae'r Atodlen Keeling hefyd yn dangos y newidiadau i Ran 3 o Atodlen 11 i Ddeddf 1988.</p>
<p>Gwelliant 7 y llywodraeth:</p> <p>Atodlen 1, tudalen 44, llinell 34, ar ôl '(e)', mewnosoder ', (3)(b)(i) a (6)'</p>	<p>Bydd y gwelliant hwn yn ychwanegu adran 151(3)(b)(i) a (6) o Ddeddf Llywodraeth Leol ac Etholiadau (Cymru) 2021 at y rhestr o ddarpariaethau a hepgorir gan y Bil hwn. Effaith y gwelliant hwn yw cynnwys darpariaethau, a fewnosodwyd yn flaenorol yn Neddf 1988 mewn cysylltiad â chosbau am fethu â darparu gwybodaeth i</p>	<p>Mae'r Nodiadau Esboniadol, yn enwedig mewn perthynas ag adran 15 o'r Bil, ac Atodlen 1 iddo, sy'n gwneud mân ddiwygiadau a diwygiadau canlyniadol sy'n ymwneud â Rhan 1, wedi'u diwygio i adlewyrchu'r ffaith nad yw'r darpariaethau hyn yn gymwys yng Nghymru mwyach.</p>

Gwelliant y llywodraeth	Effaith y gwelliant	Diwygiadau i'r Memorandwm Esboniadol/Asesiad Effaith Rheoleiddiol
	swyddogion prisio, ond sy'n cael eu disodli gan ddarpariaethau newydd yn y Bil hwn, yn yr Atodlen fel na fyddant yn gymwys mwyach yng Nghymru.	Mae'r Atodlen Keeling hefyd yn dangos y newid i Ddeddf Llywodraeth Leol ac Etholiadau (Cymru) 2021.
<p>Gwelliant 8 y llywodraeth:</p> <p>Atodlen 1, tudalen 45, ar ôl llinell 7, mewnosoder— '() ym mharagraff 11, yn is-baragraff (1A) (fel y'i mewnosodir gan baragraff [yr is-baragraff cyntaf i'w fewnosod gan welliant 6] o'r Atodlen hon) ar ôl "on an appeal under" mewnosoder "section 63L or".'. '</p>	Bydd y gwelliant hwn yn galluogi rheoliadau i ddarparu ar gyfer hawl i apelio i'r Uwch Dribiwnlys, mewn perthynas â hysbysiad atebolrwydd a osodir i wrthweithio trefniant osgoi artiffisial.	<p>Mae Tabl 5.1 (Crynodeb o'r pwerau i wneud is-ddeddfwriaeth) o'r Memorandwm Esboniadol wedi'i ddiweddarau i gynnwys y gwelliant hwn.</p> <p>Mae'r Nodiadau Esboniadol, yn enwedig mewn perthynas ag adran 15 o'r Bil, ac Atodlen 1 iddo, sy'n gwneud mân ddiwygiadau a diwygiadau canlyniadol sy'n ymwneud â Rhan 1, wedi'u diwygio i adlewyrchu'r hawl i apelio ar gyfer talwyr ardrethi i'r Uwch Dribiwnlys mewn perthynas â hysbysiad atebolrwydd a osodir i wrthweithio trefniant osgoi artiffisial.</p> <p>Mae'r Atodlen Keeling hefyd yn dangos y newidiadau i Ran 3 o Atodlen 11 i Ddeddf 1988.</p>